

Sport-Presi-Bericht MCT 2007

Ig mache a chline Rückblick über üser Aktivitäte sit dr Letschte HV womer färn am **10. November 2006** äbefaus hie im **Rest. Kreuz Allmendingen** hei gha. Ar HV si 29 Aktiv- 3 Passivmitglieder u 1 Gascht awäsend gsi. Mir hei ds Winterprogramm wie folgt gschtautet.

Am **16. Dezember 2006** hei mir **Wiehnachte z'Thierachere ir Pfrundschr** gfieret. Mir hei achli weniger müesse friere aus angeri Jahr u o üses Chuchiteam mit Urs, Silvia u Noldi het achli meh Platz gha aus oscho. Dür Samichlous het aber o hür wieder as paarne müesse ids Gwüsse rede obschon är doch oscho färn het grüegt.

Wie geng Si a hufe Ässware gschpändet worde,

vom Rothebühler Kurt ur Zahnd Erika a Hamme u vier Züpfe, üse Presi ud Silvia Dürrmüller hei zwo Züpfe, zwöi Cake, a Torte, dr Härdöpfusalat u dr Chlousesack gschbändet. A Hamme hets o vo Knutti Res gä u zwo grossi Züpfe hei Bylang Barbara u Trachsel Claudia brunge. Witeri Cake ü Gützi si vo Blumer Fränzi, Schmid Silvia, Johner Susann u Walther Marlies cho. Zum Dessert het Barbara Mathys as Tiramisu gmacht u dür Salzmann Bruno het 30 Franke ids U-Choschtekässeli ta.

Aune Spänder beste Dank.

Äs hei 21 Aktiv- 4 Passivmitglieder u 23 Gescht mitgmacht.

Am **13. Januar 2007** simer uf **d'Eisbahn z'Thun** ga schlöfle, ufem Programm wäri zwar Schlittle ufem Niederhorn gsi, aber wegen zu wenig Schnee isch dä ufds Isch verleit worde. Z'Thun ufem Ischfäud isches a glatti Sach gsi u äs heisech nid aui ufds Isch gwagt.

Aso chauts Isch git Hunger u du simer de no ids Blockhus id Oberlangenegg ga z'Nachtässe.

Äs hei 9 Aktiv- 2 Passivmitglieder u 3 Gescht mitgmacht.

Am **16. Februar 2007** simer uf **d'Curlingbahn z'Thun** üser künscht ga usprobiere. Üse Profi dür Carlo het üs mit emene Kolleg die Kunscht vom Curling probiert bizpringe u het das mit meh oder weniger erfolg o geschafft, ömu geschafft si du zletscht aui gsi.

Äs hei 12 Aktiv- 3 Passivmitglieder u 3 Gescht mitgmacht.

Am **16. März 2007** simer uf **Konolfinge ga Slot-Car fahre**. Äs het wie geng gfägt, numme schad hei nid meh mitgmacht. Dür Schwarz Ernst het vor Liechti Ueli u Kaufmann Rolf überläge mit vier Rundine vorsprung gwunne. Uf de wittere Plätz Lohri Peter, Faoro Carlo, Bylang Barbara, Dürrmüller Silvia, Greub Dora u am Schluss no Finger Urs.

Äs hei 8 Aktiv- u 1 Passivmitglieder mitgmacht

Am **30. März 2007** heimer wieder hie im **Kreuz d'Frühlingsversammlig** gha,

Äs si 21 Aktiv- u 2 Passivmitglied u 2 Gescht awäsend gsi.

Mir hei z'Summerprogramm bekannt gä u ig säge Euch itz was öppe isch gange.

Am **15. April 2007** isch dr scho tradizioneu **Zmorgebrunch** hür z'erscht mau ir **Pfrundschr z'Thierachere** gsi, äs si chli weniger aus färn cho brunche obwou mir hie ir Pfrundschr achli meh Platz hätte aus im aute Schuelhus. Ds Chuchiteam mit Urs, Silvia u Noldi het o hür wieder ganz bös gha u a dere Steu sicher a grosse Applous verdienet.

Äs hei 24 Aktiv- 7 Passivmitglieder u 21 Gescht mitgmacht.

Am **4. Mai 2007** heimer ir **Sennerei im Eriz a ausserordentlichi HV** gha, mir hei beschlosse das mir a Homepage wöue mache, u hei dür zueschlag zum erstelle vom Internetuftritt, am Kolleg vo Ellenberger Stefan, am Mike Visentin gmacht.

Äs hei numme 14 Aktiv- u 3 Passivmitglieder u 1 Gascht mitgmacht.

Vom **26.- 28. Mai 2007** ha ig **d'Pfingschtusfahrt ids Lechtal** organisiert, mir si vo Thun via Schallenberg, Entlebuch, Glauenberg, Seelisberg, Altdorf, Klausenpass nach Netstal gefahre wo mir hei z'Mittagässe, übere Chlouse hets achli grägnat aber süsch isches eigentlich gäbig gsi. Witer simer du via Kerenzerberg z'Walenstadt ufd Autobahn bis Schaan id Autobahnraststätte wo mir du ändlich hei chönne a Vignette choufe. Mir hei du d'Schwiz verlah u si via Rankweil, Furkajoch, Schröcken nach Holzgau ins Hotel Schönauerhof. Am Abe heimer guet gässe u dür Usgang ir Bar mit Musig vo zwene Gritarische isch öppe bis am zwöi gange. Ar Pfinste si du die meischte äbefaus ufene Tour mitcho. Mir si via Hahntennjoch, Imst, Sölden Richtig Timmelsjoch, bir Moutstelle himer umkehrt u si uf Oetz ga z'Mittagässe. Du isches de witer via Kühtai, Seefeld womer hei z'Vieri gno witer nach Mittenwald, Garmisch, Namlos wieder zrugg uf Holzgau ids Hotäu. A däm Abe isch du nüt los gsi um mir si bizite ga lige. Am nächste Morge isches du wie adroht nümme aso gäbig gsi wie am Sunntig. Mit si no öppe 10min ohni Räge gfahre u si du nüm über die höche Bärge. Äs isch huere chaut gsi u mir si du müglichst diräkt heizue. Via Schwarzenberg, Dornbirn, Herisau, Wattwil simmer ufe Rickepass ga z'Mittagässe. När simer du direkt via Entlebuch hei ufe Schallebärg wos öppe 10cm Schnee het gha. Dert heimir üs as letschtsmau gwermt u si du heizue. Äs git setig wo hei gschwore niieeee meh are Pfinste mit's cho.

Äs hei 7 Aktiv- 2 Passivmitglieder u 2 Gescht mitgmacht.

Am **10.Juni 2007** het dür Rolf d'Usfahrt **a Louenensee** naheghout womer färn hei wöue mache. Hür isch du z'Wätter besser gsi u si hei a dä See ueche chönne ga brätle. Ig bi leider nid dürbigsi u kenne kener witeri Detail.

Äs hei 10 Aktiv- 2 Passivmitglieder u 2 Gescht mitgmacht.

Am **22.Juni 2007** simer ids **Eggiwil ga Minigolf** spiele, mir si nid aso vii gsi u hei zwo Gruppe gmacht. Die erschi Gruppe het ar zwöite z'Läbe achli schwär gmacht wiusi d'Hinderniss geng achli het schwiriger gmacht u drum ha ig du aso überläge verlore ;-)). D'Rangliste: 1.Trachsel Christian 51, 2.Bylang Barabra 57, 3. Kaufmann Rolf 63, 4.Blum Buddy 66, 5.Finger Urs + Jakob Nelly 67, 7.Gurtner Astrid + Lohri Peter 69, 9.Dürmüller Silvia 73, 10. Liechti Ueli 77.

Äs hei 9 Aktiv- 1 Passivmitglieder u 1 Gascht mitgmacht.

Am **15.Juli 2007** het d'Barbara a Usfahrt i **Jura** organisiert, mir si vo Thun über d'Prärie i uf la Sarraz id Kafi u du isches de witter a Lac de Brenets zum Mittagässe. Via Le Locle, Ins ids Lamm Rohbachgrabe isches du heizue. Cha leider d'Route nümme besser beschribe bi numme hingernachegfahre ;-).

Äs hei 11 Aktiv- 2 Passivmitglieder u 1 Gascht mitgmacht.

Am **20.Juli 2007** himer **z'Kiese** wöue Brätle, heis aber du lasi wius isch cho Räge wine more.

Am **12.August 2007** simer üsi **Pässefahrt** ga mache womer üser traditionelle Päss wieder einisch hei düregno. Mir si vo Thun ar Bucht na via Interlake Brienz ufe Susten womir üse erscht haut hei gmacht u üs afe chli hei chönne werme. Mir si du äne ache u wiu mir d'Gägend ja guet kenne himer das mite „Wägwisser“ nidaso gnau gno u hei du prompt in Realp ohni üser Froue müesse afa ässe (si hei no a Usflug ufe Gotthard gmacht). Witer isches du via Furka, Grimsel, Meiringen, Brünig, Panoramastrasse ufe Schalleberg heizue. O wemir doch üser Päss sehr guet kenne, wärs schön gsi we öppe as paar meh wäre mitcho.

Äs hei 7 Aktivmitglieder u 1 Gascht mitgmacht.

Am **24.August 2007** simer uf **Rubige visavi vom Campagna** ga Brätle, hür simer achli witer nide ar Aare gsi wiusi ja dür Aarelouf hei korrigiert. Gfüret hei d'Astrid u dür Buddy mitem Houz wo üse Presi het mitgä, für d'Würscht u Fleisch z'grilliere himer o Üsus Grill törfe bruche. Mir hei gfüret u grilliert bise isch fischer worde u hei du Tisch u Bänk im Schinwärferliecht müsse füllume.

Äs hei 6 Aktiv- 2 Passivmitglieder u 2 Gescht mitgmacht.

Am **8.+9.September 2007** het Urs **2-Tag i Schwarzwald** organisiert. Mir si vo Thun via Sumiswald uf Aarwange ids Kafi, über d'Autobahn Egerkingen, Basel, Lörrach simer du i Schwarzwald cho. Via Schönau womer hei z'Mittagässe simmer über Titisee, Furtwangen, Hausauch uf Oberhammersbach i üses Hotel Bären cho. Wemer nid no as chlises Umwägli gmacht hätte wäremir uf d'Minute gnau acho. Am Abe isch du Chiubi gsi im Bäre, aber mir si achli müed gsi u du glich nid vii nach Mitternacht ga lige. Am nächste Tag isch z'Wätter nüm so guet gsi, äs het geng achli gnieslet. Mir si via Oppenau, Strassburg, Colmar, Altkirch womer fasch nümme hei usefunge, überne Fäldwäg nach Delemont, Pierre Pertuis wieder heizue.

Äs hei 12 Aktiv- 5 Passivmitglieder u 4 Gescht mitgmacht.

Am **21.September 2007** himer üse Höck am **Töffträff Schallebärg** gha, mir hei eigentlich z'Mutzli reserviert gah, aber wius aso gäbig isch gsi himmer du üser Poulet u Stossdämpfer fürusse gässe.

Äs hei 16 Aktiv- 4 Passivmitglieder u 3 Gescht mitgmacht.

Am **7.Oktober 2007** isch üsi **Saison-Schlussfahrt mit Astrid u Buddy i Jura** gsi, vo Thun sisi via Pierre Pertuis, Saignelegier uf St-Hippolyte ga z'Mittagässe. Ueber La Chaux-de-Fonds, Ins sigs wieder heizue. Bi leider nid dürbigsi aber Astrid u Buddy wüsse vellech no meh.

Äs hei 7 Aktivmitglieder u 5 Gescht mitgmacht.

Am **19.Oktober 2007** simer uf **Rubige ga Bowling spiele**, mit hei zwo Bahne reserviert gha u si du meh oder weniger Profihaft ads Wärk, äs het öppe chli gäds lache we die cheibe Chugle eifach nid dert häre isch wosi hät söue. D'Ranglistet het du wiefolgt usgseh: Kneubühl Kurt, Liechti Ueli, Kaufmann Rolf, Pirotta Denis, Lohri Peter, Blum Buddy, Team Silvia+Astrid, Jeanmaire Fritz, Bylang Barbara, Finger Urs, Kaufmann Porn und Wiederkehr Josef.

Äs hei 8 Aktiv- 1 Passivmitglied u 4 Gescht mitgmacht.

So däs wärs gsi vo üsere letschte Saison, ig gloube während üsne Usfahrte heimer keiner Unfäu gha u o süsch, bim freie Fahre, isches glaubeni bi Materialschäde oder Prellige blibe.

Ig tue mi no entschuldige dass zum Teil nid aso usführlich isch prichtet worde, aber ig bi vii ungerwägs u mängisch weisi de nümmit wämm das was isch passiert.

Im Grossä u Ganze isches sicher as Glungnigs jahr gsi, u ig globe dasme i däm Rahme sött witerfahre.

Möschberg, 14.November 2007

Eueä Sport-Presi

Ueli Liechti